

*pater materque defecerit, aequum est, ut avus aviaque pro mortuo filio filiaque curam suscipiant nepotum ac neptium. Quod et in parentibus longius remotis pari ratione procedit. Atque hinc ortum traxit ius illud, ut nepos filii loco succedat - - - Denique servasse repraesentationem in successione descendentium rempublicam Hebraeorum, sanctissimis ipsius Dei institutis celebratissimam. Quam in rem Strykius ad testimonium citat caput Geneseos II. v. 31. Vid. tract. de success. ab intest. Diss. I. §. 68. Et accuratius Seldenus in Libro singulari de Successionib. in bona defunct. ad leges Ebraeorum cap. 1. repraesentationem apud eos usitatam enarrauit. Vbi: nepotes, inquit, et neptes eorumque posteris, defunctis liberis, induta parentum persona avo succedunt. Et mox recitato Numeror. capitis 27. versu 8. neque, inquit, a liberorum ratione diuersam heic habent eam, quae est nepotum neptumue, qui liberorum defunctorum siue parentum suorum locos occupant adeoque iure successionis vicariae, seu, quod vocamus, repraesentationis, succedunt.*

§. XI.

Sed alii iam obseruando summatim notauerunt, istas et reliquas, quae circumferuntur, rationes, quibus successionem ab intestato, quatenus ea primum ad descendentes, dein ad ascendentes, postremo ad collaterales deuoluitur, iuris naturae principiis subnixam esse perhibent, magis suasorias esse quam praeceptiuas, neque, quid necessario fieri debeat, sed, quid expediat ac prudens aut venustum decensque sit in successione, commonstrare. Vid. Illustris Böhmerus in Introd. in ius publ. vniuersale Part. Spec. Libr. III. Cap. IV. §. 18. et not. lit. q. Paullum tamen explicatius dicam. Quum Deus cuilibet homini rebus vtendi creatis ad

Rationes successionem ab intestato ex iure naturae asserentium suasoriae tantum sunt, non praeceptiuae. Laudatur Böhmerus,